

Ni Presidente  
Thomas S. Monson



# Panagbiag a Nawadwad

**I**ti rugit ti baro a tawen, karitek dagiti Santo iti Udu-udina nga Aldaw iti amin a lugar a mangaramid iti bukod, napasnek, addaan iti kaipapanan a panagsapsapul iti makunak a nawadwad a biag—maysa a biag a napnuan iti adu a balligi, kinaimbag, ken parabur. Kas iti pannakasursurotayo iti ABC iti pagadalan, idiyak dagiti bukodko nga ABC a tumulong kadatayo amin a makagun-od iti nawadwad a biag.

## Maaddaan iti Nasayaat nga Attitude wenno Galad

Ti *A* iti listaak iti ABC ket attitude wenno galad. Insurat ni William James, maysa nga immuna nga American psychologist ken philosopher, “Ti kadakkelan a rebolusion ti henerasiontayo ket ti pannakatakuat a dagiti tao, babaen ti panangbalbaliw kadagiti akin-uneg a galad ti pampanunotda, mabalinda a baliwan dagiti akinruar nga aspeto wenno kita ti biagda.”<sup>1</sup>

Kaaduanna a banag iti biag ket agpannuray iti attitude wenno galadtayo. Ti wagas a panangpilitayo a mangkita kadagiti banag ken panangresponde kadagiti dadduma ket makaaramid iti amin a pagdumaan. Ti mangaramid iti amin a kabaellantayo ket kalpasanna pilientayo ti agragsak maipapan kadagiti kasasaadtayo, ania man dagitoy, ket makaisangbay iti talna ken pannakapnek.

Ni Charles Swindoll—awtor, edukador, ken pastor a Kristiano—kinunana: “Para kaniak, ti attitude wenno galad ket napatpateg pay ngem . . . iti napalabas, . . . ngem iti kuarta, ngem kadagiti kasasaad, ngem kadagiti pannakaupay, ngem kadagiti balligi, ngem no ania ti panangkuna wenno sawen wenno aramiden dagiti dadduma a tao. Napatpateg daytoy ngem ti langa, kinasaguday, wenno paglaingan. Daytoyto ti mangbukel wenno mangwara iti maysa a timpuyog, iti maysa a simbaan, iti maysa a pagtaengan. Ti naisangsangayan a banag ket adda pilitayo iti inaldaw maipapan iti attitude wenno galad nga ipakitayonto para iti dayta nga aldaw.”<sup>2</sup>

Ditay kabaellan nga iturong ti angin, ngem kabaellantayo nga ilasat dagiti layag. Para iti kadakkelan a ragsak, talna, ken pannakapnek, sapay koma ta *pilientayo* ti nasayaat wenno napintas a galad.

## Mamatika iti Kabaellam nga Aramiden

Ti *B* ket believe wenno mamatika—iti kabaellam nga aramiden, kadagiti adda iti aglawlawmo, ken kadagiti agnanayon a pagbatayan wenno prinsipio.

Agbalinka a napudno iti bagim, iti dadduma, ken iti Nailangitan nga Amam. Maysa a tao a saan a napudno iti Dios agingga a naladaw unayen ket isu ni Cardinal Wolsey a, segun ken ni Shakespeare, nangbubos iti

naunday a biag iti panagserbi iti tallo a kangatuan a turayen ken nagsagrap iti kinabaknang ken bileg. Iti kamaudiananna, inikkat ti awan anusna nga ari ti bileg ken dagiti sanikuana. Insangit ni Cardinal Wolsey:

*No nagserbiak la koma iti Diosko nga addaan iti  
kagudua ti regta  
nga inserbik iti arik, awan koma Isuna iti nataengan  
a tawenko.  
Pinanawannak a lamulamo kadagiti kabusorko.*<sup>3</sup>

Insurat ni Thomas Fuller, maysa a padi ken estoriador nga Ingles a nagbiag iti maika-17 a siglo, daytoy a kinapudno: “Saan a pudno a mamatpati ti tao a saan nga agbibig a mayannurot iti pammatina.”<sup>4</sup>

Saanmo a limitaran ti bagim ken dimo palugodan dagiti dadduma a mangkumbinsi kenka a malimitaranka iti mabalinmo nga aramiden. Mamatika iti bagim ket kalpasanna agbiagka tapno maragpatmo dagiti mabalinmo a pagbalinan.

Magun-odmo no ania ti patiem a kabaalam a gun-oden. Agtalek ken mamatika ken maaddaan iti pammati.

### **Sanguem dagiti Karit nga Addaan iti Tured (Courage)**

Ti C ket para iti courage wenno tured. Ti tured (courage) ket agbalin a napateg ken addaan iti kaipapanan a saguday no saan unay a maibilang daytoy a kas panagtallugod a matay a situtured no di ketdi kas maysa a determinasion nga agbiag a sidadayaw.

Kinuna ti Amerikano a mannurat ken mannaniw a ni Ralph Waldo Emerson: “Ania man ti aramidem, kasapulam ti tured. Ania man ti ikeddengmo nga aramiden, adda maysa a tao a kanayon a mangibaga kenka a nagbiddutka. Kanayon nga adda dagiti rumsua a pagrigatan a mangsulog kenka a mamati a husto dagiti kritikom. Ti panagplano iti nasken nga aramiden ken panangaramid iti daytoy agingga a maileppas ket agkasapulan iti isu met laeng a tured a kasapulan ti maysa a soldado. Ti talna ket addaan kadagiti balligina, ngem agkasapulan daytoy kadagiti natured a lallaki ken babbai tapno magun-od dagitoy.”<sup>5</sup>

Addanto dagiti panawen a mapabutngan ken mapaykanto. Mabalin a mariknam a naabakka. Mabalin nga agparang a nakaad-adu dagiti tubeng iti

pananggun-od iti balligi. No dadduma mabalin a mariknam a kasla sika ni David a mangikarkarigatan a mangranget ken ni Goliat. Ngem laglagipem—ni David ket nangabak!

Kasapulan ti tured (courage) tapno makaaramid iti umuna a tignay nga agturong iti tartarigagayan ti maysa a tao a panggep a tun-oyen, ngem uray pay dakdakkal a tured ti kasapulan no maitublak ti maysa a tao ket nasken nga ikarigatanna manen iti maikadua a gundaway a mangragpat iti panggepna a tun-oyen.

Maaddaan iti determinasion a mangaramid iti panangikarigatan, ti kinapasnek iti panangipatungpal iti maysa a maikari a panggep a tun-oyen, ken ti tured a mangsango saan laeng a kadagiti karit nga umay a saan a mapakpakadaan ngem ketdi panangikarigatan pay iti maikadua a gundaway, no kasapulan. “No dadduma ti tured ket isu ti bassit a timek iti gibus ti aldaw nga agkunkuna, ‘Padasekto manen inton bigat.’”<sup>6</sup>

Sapay ta malagiptayo dagitoy nga ABC iti panangrugitayo nga agdaliasat nga agturong iti baro a tawen, a maaddaan iti nasayaat wenno napintas a galad, pammati a magun-odtayo dagiti panggep a tun-oyen ken resolusiyontayo, ken ti tured a sumango iti ania man a karit a sumangbay iti biagtayo. Ket kalpasanna ti nawadwad a biag ket magun-odtayonto.

#### **DAGITI NAGADAWAN**

1. William James, in Lloyd Albert Johnson, comp., *A Toolbox for Humanity: More Than 9000 Years of Thought* (2003), 127.
2. Charles Swindoll, iti Daniel H. Johnston, *Lessons for Living* (2001), 29.
3. William Shakespeare, *King Henry the Eighth*, act 3, scene 2, lines 456 – 58.
4. Thomas Fuller, iti H. L. Mencken, ed., *A New Dictionary of Quotations* (1942), 96.
5. Ralph Waldo Emerson, iti Roy B. Zuck, *The Speaker's Quote Book* (2009), 113.
6. Mary Anne Radmacher, *Courage Doesn't Always Roar* (2009).

---

### **PANANGISURO MANIPUD ITI DAYTOY A MENSAHE**

Ibilang ti panangawis kadagiti miembro ti familia a mangibinglay kadagiti bukodda a padas a nakatulongan ida ti positibo a galad, pammati iti bagida, wenno tured. Wenno awisen ida a mangbirok kadagiti pagarigan dagitoy tallo a pagbatayan kadagiti nasantuan a kasuratan. Mabalinmo ti agsagana a mangisuro babaen ti sikakararag a panangpanunot kadagiti nasantuan a kasuratan wenno dagiti bukodmo a padas.

## AGTUTUBO

### Tured a Sumaranget iti Bagyo

Ni Maddison Morley

Iti maikadua a rabii ti kamping ti Young Women iti stakeko, nagtudo iti napigsa ken nagalipugpog. Agarup 24 a young women iti wardko ti dimmar-ay iti kamping nga idauluan ti dua a lider, ken nasken nga umanaykami amin iti maysa a bassit a kalapaw tapno masalakniban. Napigsa ti bayakabak ti tudo ken ad-adda a pimmigsa ti angin. Nasken a kanayon a laglagipek ti kararag para iti talged nga indiaya ti stake presidentmi iti nasapsapa. Insawang met ti wardmi iti bukodmi a sangagrupuan a kararag iti kalapawmi, ken nagkararagak met iti bukodko.

Adu a babbai ti nagbuteng, ket nalaka a makita no apay. Saan unay a natibker ti kalapawmi, ken addakami laeng iti igid ti karayan. Iti agarup 20 a minuto ad-adda a pimmigsa ti bagyo isu a nasken a tumaray ti sibubukel a stake manipud kadagiti kalapaw ti wardda a napan kadagiti kalapaw dagiti counselor, nga adda iti nangatngato a lugar. Nangisawang ti stake presidentko iti sabali pay a kararag, ken nagkantakami kadagiti himno, kankanta ti Primary, ken kankanta ti kamping tapno mangliwliwa iti bagbagimi. Wen, napabutngankami, ngem nariknami nga agsayaatto ti amin a banag. Kalpasan ti kagudua ti oras mabalinen ti agsubli kadagiti kalapawmi iti ward.

Iti saan a nabayag naammuanmi no ania ti napa-samak iti alipugpog iti dayta a rabii. Nagbalin daytoy

a dua a bagyo. Maysa kadagitoy ti nangpulpuligos iti makanawanmi ket nagpulpuligos ti maysa pay iti makanigidmi. No ania ti napasaranmi ket saan a daytoy ti kakaruan!

Ammok a dinengngeg ti Dios dagiti kararagmi iti dayta a rabii ket sinaluadannakami iti karungsotan ti bagyo. Apay a magudua koma ti alipugpog malaksid no nasken nga aramiden daytoy ti Dios? Ammok a kadagiti bagyo ti biag, makapagkararagtayo a kanayon iti Nailangitan nga Ama ket dumnggeg ken sungbatannatayo, a mangted kadatayo iti tured ken saluad a kasapulantayo tapno masalaknibantayo.

## ANNAK

### Kapitan Moroni

Naaadaan iti tured ni Kapitan Moroni bayat ti panangsangona kadagiti karit. Inayatna ti kinapudno, wayawaya, ken pammati. Impaayna ti biagna iti panangtulong kadagiti Nephite a nangtaginayon iti wayawayada. Makapagbalinkayo a kas ken ni Kapitan Moroni babaen ti panangsango kadagiti karit nga addaan iti tured. Mabalinyo pay ti agaramid iti bukodyo a wagayway ti wayawaya babaen ti panangisurat kadagiti banag a napateg kadakayo ken iti pamiliayo.

#### Sadino ti Pakaammuan iti Ad-adu Pay

**Alma 46: 11–27:** Ti wagayway ti wayawaya

**Alma 48:11–13, 16–17:** Dagiti kababalin ni Moroni



Pammati, Pamilia, Tulong

# Panangaywan ken Panagserbi babaen ti Visiting Teaching

*Adalenyoy daytoy a material, ken no maitutop, paglilinnawaganyoy daytoy kadagiti kakabsat a babbai a sarungkaranyoy. Usarenyo dagiti saludsod a mangtulong kadakayo a mangpapigsa kadagiti kakabsatyoy a babbai ken mangaramid iti Relief Society nga aktibo a paset iti bukodyoy a biag.*

“Ti ayat [kaipapananna] ket dakdakkal nga amang ngem iti rikna ti kinamanangngaasi,” insuro ni Presidente Henry B. Eyring, Umuna a Mammagbaga iti Umuna a Pangu-luen. “Ti ayat [charity] ket agtaud iti pammati ken ni Apo Jesucristo ken bunga daytoy ti Pannubbotna.”<sup>1</sup> Para kadagiti kakabsat a babbai iti Relief Society, ti visiting teaching ket mabalina a tignay ti ayat, maysa a napateg a wagas a pakaaramatan iti pammatitayo iti Mangisalakana.

Babaen iti visiting teaching, mangtedtayo iti panagaywan babaen ti panangsarungkar iti tunggal kabsat a babai, panangibinglay iti ebanghelio, ken panagkalikagum a mangam-ammo kenkuana ken mangammo kadagiti kasapulan ti pamiliana. Ti visiting teaching ket agbalin nga aramid ti Apo no dagiti tao ti ipamaysatayo imbes a ti porsiento, inlawlawag ni Julie B. Beck, sapa-sapa a presidente ti Relief Society. “Iti kinapudnona, ti visiting teaching ket di kaano man aggibus.” Daytoy ken ad-adda pay a wagas ti biag ngem iti maysa nga aramid. “Ti sipapasnek a panagserbi a kas maysa a visiting teacher ket pakakitaan ti kinadisipulotayo.”<sup>2</sup>

Bayat ti panangtedtayo iti agtululoy ken nainkararagan a panangaywan, masursurotayo no kasano ti kasayaatan a panagserbi ken

panangipaay kadagiti kasapulan ti tunggal kabsat a babai ken ti pamiliana. Ti panagserbi ket mabalina a maaramid iti adu a kita—adda dakkel ken adda saan unay a dakkel. “Masansan a dagiti babassit nga aramid ti panagserbi ket umanayen a kasapulan tapno maparegta ken mabendisionan dagiti dadduma: maysa a saludsod maipanggep iti pamilia ti maysa a tao, dagiti naregget a balikas ti panangpapigsa iti pakinakem, maysa a napudno a pammadayaw, maysa nga ababa a surat ti panagyaman, maysa nga ababa nga awag iti telepono,” insuro ni Presidente Thomas S. Monson. “No managpaliw ken naalibtaktayo, ken no agtignaytayo kadagiti parikna nga umay kadatayo, mabalina nga adu a nasayaat ti maileppastayo. . . . Saan a mabilang dagiti aramid ti serbisio nga it-ited ti dakkel a buyot dagiti visiting teacher ti Relief Society.”<sup>3</sup>

## **Manipud iti Pakasaritaantayo**

Idi 1843, dagiti miembro ti Simbaan idia Nauvoo, Illinois, ket nangingay iti uppat a ward. Idi Hulio iti dayta a tawen, nangdutok dagiti lider ti Relief Society iti visiting committee a buklen ti uppat a kakabsat a babbai para iti tunggal ward. Ira-man dagiti responsibilidad ti visiting committee dagiti panangamiris kadagiti kasapulan ken panangkolekta

kadagiti donasion. Inusar ti Relief Society dagitoy a donasion tapno matulongan dagiti agkasapulan.<sup>4</sup>

Nupay saanen nga agkolkolekta dagiti visiting teacher iti donasion, pinagtalinaedda ti responsibilidad a mangamiris kadagiti kasapulan—naespirituan ken temporal—ken agrabahoda a mangted kadagita a kasapulan. Inlawlawag ni Eliza R. Snow (1804–87), maikadua a sapa-sapa a presidente ti Relief Society: “Ti maysa a mannursuro . . . ket nasken nga adda kenkuana ti Espiritu ti Apo, bayat ti iseserrekna iti maysa a balay tapno ammuenna no ania nga espiritu ti makitana sadiay. . . . Agpakasikayo iti Dios ken iti Espiritu Santo a manggun-od [iti Espiritu] tapno kaba-lanyonto ti mangkita iti dayta nga espiritu nga agnanaed iti dayta a balay . . . ket mabalina a mariknayo ti mangisao kadagiti balikas a mangpakapia ken mangliwliwa, ket no makitayo ti maysa a kabsat a babai a malamlamin, arakupenyoy daytoy a kas iti panangarakupyo iti maysa nga ubing ket pabaraenyoy [isuna].”<sup>5</sup>

## **DAGITI NAGADAWAN**

1. Henry B. Eyring, “The Enduring Legacy of Relief Society,” *Liahona*, Nob. 2009, 121.
2. Julie B. Beck, “Relief Society: A Sacred Work,” *Liahona*, Nob. 2009, 114.
3. Thomas S. Monson, “Three Goals to Guide You,” *Liahona*, Nob. 2007, 120–21.
4. Kitaen iti *Daughters in My Kingdom: The History and Work of Relief Society* (2011), 105.
5. Eliza R. Snow, iti *Daughters in My Kingdom*, 108.

## **Manipud kadagiti Nasantuan a Kasuratan**

Juan 13:15, 34–35; 21:15;  
Mosiah 2:17; Doktrina ken  
atulagan 81:5; Moises 1:39

© 2012 ti Intellectual Reserve, Inc.  
Nailatang amin a karbengan. Naimaldit iti  
EUA. Pannakaanamongna iti Ingles: 6/11.  
Pannakaanamongna a maipatarus: 6/11.  
Pannakaipatarus ti *Visiting Teaching Message*,  
*January 2012*. Ilokano. 10361 864

## **Ania ti Maaramidko?**

**1.** Ania ti ar-aramidek tapno matulongak dagiti kakabsatko a babbai a makarikna a maysaak a gayyem a mangipatpateg ken mangay-aywan kadakuada?

**2.** Kasano a makapagbalinak a nasaysayaat iti panangaywan ken panangipateg kadagiti dadduma?

Para iti ad-adu pay nga impormasion, mapan iti [www.reliefsociety.lds.org](http://www.reliefsociety.lds.org).